

# Churer Schnudergoofa 2025

Us am Bundeshuus in Bern – ghöört ma wildi Gschichta.  
Vor Abschtimmig im letschta Johr - wend miar eu jetz prichta  
A drei und zehnti AHV sölls geh für Maa und Frau.  
Nu wer das alles blecha söll, - das weiss bis hüt khei Sau!

## Refrain

*Miar sind nu zwei kliini Würschtli, ohni Ahnig vu dr Welt.  
„Snudergoofa“, meint dr Lehrer, wenn är üüs vor d’Tüüra schtellt.  
Aber immer an dr Fasnacht, zahlend miar das alles hei,  
allna Nöck und Sesselfurzer schiffend miar ans Bai.*

Als Analphabet khusch dr vor, wenn d’ tuasch das Büachli lääsa.  
Fühlsch dii wia na Perückaschtänder oder an aalta Bääsa.  
Text und Schprooch sind nit z’verschtöh, - für alli recht chaotisch.  
D’Abschtmigsresultat bewiisends, - zeigend sich exotisch.

Chaos um da Leopard, um d’RUAG und no meh.  
Power – Panzer – Plaita – alles hät sii gseh.  
Sii hebi d’Naasa voll, - well nümma, - hät sii vo sich gee.  
Gäng zrugg an da Kuchiherd - und kochi d’SVP.

Osteoporosa - Neurosa - und au no Arthroosa  
D’Krankakassapräämia sctiigend - au dur d’Gürtelroosa.  
Dia hochä Präämia machend Buuchweh - und sind unwirksam.  
Dä Effekt, wo alli hend - isch Grossalarm im Darm.

Zwei tolli Hecht, hend wella, - Graubünda öppis klaua.  
Beschwärda und Prozess tüend das partout versaua.  
Öb Lebrument oder Schawinski, - isch üüs piepegal.  
Gar khei Radio Grischa meh - wär gopfridschtutz fatal.

Drei plus zwei git füüf - so sölls in Zuakunft sii.  
Miar findend das genial - sind beidi voll drbii.  
Füüf regierend künftig - üsars schööna Khuur  
Und zwar zum gliicha Lohn wia drei - das isch wia na Trumpf Puur.

A Tascharechner im Aazug froggt: “Was söll ii jetz bruafllich macha?”  
Miar hend a big idea for him – do hätt er nüt meh z’Lacha,  
Khei Amt und au khei Politik – passé wär ds Flohnerlääba,  
als Assischtent vum BANE - in Zuakunft an da Muura klääba.

Im Einzelhandel ischs turbulent – Läädali tüand schterba,  
wägem schstrukturella Wandel, Online Shops khönnd ärba.  
Herzog, Weltbild, Intimissimoooo sctöönd jetz still.  
Kapituliart hät au dr Fischer, - Nai! Nit däa vu Wädenswil.

Khei Parada vu da Schlager, - khei Fescht meh, - das isch krass.  
Z’nöchscht Joohr gits in üüsrrar Schtadt khei Piar meh über d’Gass.  
A neuu Halla werdi baut, alles sei denn im Loot.  
Trotzdem a Megafruscht für Khuur, denn - d’Altschtadt, dia isch toot.

Jeda Tag uf Schlittschuah z’schtooh isch für üüs ds Paradies.  
Dreierschprüng und Doppelaxel, - alles uf em Iis.  
Rotation und Körperschpanning isch dabei zentral.  
Dr HCD macht das mit Riechsalz, - und zwar ganz legal.

„Wo sind denn üüsri schnella Füass?“ - froggt sich dr FCB.  
„An da Bei natüürlig, - sii tüend so schrecklich weh“.  
Vrbii sind jetz dia Meischterschafta und ds Hinka hinnadrii,  
ma isch am Himmel a biz nöcher, - dank am Shakiri.

Fremdschproocha sind a guati Sach, - dr Lehrer meint: - zentral,  
zum üüs uf ds Lääba vorbereita, - scho fasch phänomenal.  
Denn at work è domandato - qualche competenzaza  
Das wüssend sogar miar, - drum tüä miar d'Schtunda au nia schwänza.

In Religion und Ethik - lernend miar neu Sacha  
und öppamool gits döt sogar au no öppis z'lacha.  
„Was isch denn Dreifaltigkeit“, frogt dr Lehrer d'Angelina.  
„Dr Pappa b'hauptet das sind Russland, - d'USA und China.“

Dr Trump meint optimistisch - er khönni alles macha  
Dänemark und Panama - tüend über in nu lacha  
Er isch tüüf im Delirium - hät grossi Fantasie,  
und checkt villicht, - regiara - isch khei Monopoly.

KI isch hüt omnipräsent, - bruucht nu mega viil Pfuus.  
Für d'Umwelt isch das grottaschlecht, niamert meh khunnt druus.  
Wenn dr Lehrer sait zu üüs: - „Schaltend z'Hirni iii!“  
Sägend miar zwei fadagrad: - „Miar *schaffend* uf schtänd bii.“

Letscht Wucha, in dr Tagesschau hät z'Naani a Pricht gseh.  
Vu Drohna, KI und so wiiter, sii hät gsait: - „Oh, jee!“  
„Maitla, soo na Roboter han ii no gar nia gseh.“  
„Weisch Naani, - amol im Altersheim - bringt dä diar denn dr Tee.“

Agglomeration, das Wort isch hüt in aller Mund.  
Dr ÖV döt söll funktioniara und zwor all Halbschtund.  
Nu eins hät mä drbii vergässa, - miar sägend: - „Oh weh!“  
Wer söll in allna Züüg und Büss - z'Cockpit überneh?“

Üsra Feriadschob hät sogar Risikozualaaga.  
Sehr guat zahlt und intressant, - miar khönnd üüs nit beklaaga.  
Schtöönd iar uf dr Autobahn im Shtau - und khöönd nit frääsa,  
sind miar zwei sicher am verloorni Koffra zemmalääsa.

Am Lauberhorn, do tschätterens pfilschnell in Richtig Ziil.  
D'Mamma hebt sich d'Auga zua und schreit: - „Miar isch das z'viil.  
Bitte, iar zwei, machend das nia, - ii würds nit überschtoh.“  
„Khei Ding, Mamma, muasch nu - a biz meh Sackgeld schpringa loh.“

Dr Götti hät üüs gfrogt, was für an Unterschiid es git  
zwüscha ma Zauberer und ama Typ vur Politik.  
Dr Zauberer, a schlaua Fuchs? - Dia andara sind Affa?  
Dr Zauberer git offa zua, dass er mit Tricks tuat schaffa.

Bewegig isch im Alter wichtig, - hebt Geischt und Körper fit,  
das weiss sogar a Krückschtockgänger. - Nei! Iar glaubends nit.  
Frogt doch z'Naani dr Neeni cool, wenn sii bindet iari Schua:  
„Wenn ii scho grad do dunna bin - was khann ii für dii tua?“

D'Eltra hend üüs gsait, miar söllend guati Beischiil geh,  
im neua Johr khei Prüglereia und Tummheita meh.  
Lüüga, heimlich Dschointli raucha, - findend miar jetz doof,  
und bliibend aifach wia miar sind: - a Khuurer Schudergoof.

A tüürs Projekt giz z'Bonaduz, - a Parkhuus will ma baua.  
Untrem coop oder villicht dr Schualplatz gar versaua.  
Viil günschtiger khunnt üüsri Idee, - khönnts zwor nit gnau beziffra,  
Dr coop, dä kauft füüf E-Büssli und tuat d'Huushält belifra.